



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-169

24/02/2020

ქ. თბილისი

ახალციხის მუნიციპალიტეტში, სოფ. ანდრიაწმინდას მიმდებარე ტერიტორიაზე სასარგებლო წიაღისეულის, „ოდუნდის“ ტუფობრექციის მოპოვებაზე სკრინინგის გადაწყვეტილების შესახებ

სსიპ წიაღის ეროვნული სააგენტოს მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია ახალციხის მუნიციპალიტეტში, სოფ. ანდრიაწმინდას მიმდებარე ტერიტორიაზე სასარგებლო წიაღისეულის, 3 398 000 მ³ „ოდუნდის“ ტუფობრექციის მოპოვების სკრინინგის განცხადება.

წარმოდგენილი დოკუმენტაციის თანახმად, სასარგებლო წიაღისეულის მოპოვება დაგეგმილია ახალციხის მუნიციპალიტეტში, სოფ. ანდრიაწმინდას მიმდებარე ტერიტორიაზე. ერთ უბნად წარმოდგენილი სალიცენზიო ობიექტი მდებარეობს ახალციხის დეპრესიის უკიდურეს აღმოსავლეთ ნაწილში, ზღვის დონიდან 1800-2000 მეტრის სიმაღლეზე. აღნიშნული ტერიტორია წარმოადგენს სახელმწიფო საკუთრებას. ობიექტიდან უახლოესი დასახლებული პუნქტია სოფ. ანდრიაწმინდა, რომელიც საპროექტო ტერიტორიიდან დაახლოებით 5 კმ-ში მდებარეობს. ტერიტორიიდან დაახლოებით 500 მეტრში მდებარეობს სახელმწიფო ტყის ფონდი, ხოლო 1,5 კმ-ში მიედინება მდ. ურაველი.

წარმოდგენილი განცხადების მიხედვით, სალიცენზიო ობიექტი აგებულია ზედა მიოცენ-ქვედა პლიოცენური ასაკის კონტინენტურ-ვულკანური ეფუზიური წარმონაქმნებით. ტუფობრექციების აგებულება მრავალგვარია, რომლებიც ძირითადად შეცემენტებულია თიხური მასალით. წარმოდგენილი საბადოს სასარგებლო წყება დაყოფილია სამ სახესხვაობად, კერძოდ:

- მსხვილნატეხიანი, კარგად შეცემენტებული ტუფობრექციები, რომელთა ძირითადი მასა მოყვითალო-ნაცრისფერია, ფორიანი ლავების ნატეხები 60 მმ ზომისაა და წარმოდგენილია მუქი ნაცრისფერი სტრუქტურით.
- საშუალო ნატეხიანი, სუსტად შეცემენტებული ტუფობრექციები, 20 მმ ზომისაა და წარმოდგენილია მოყვითალო-ნაცრისფერი და მუქი ვარდისფერი სტრუქტურით.

- ნახევრად ფხვიერი, წვრილნატეხოვანი, ტუფები და ტუფობრექჩიები, წაბლისფერ-წითელი ძირითადი მასით, წიღისეზური, რკინის შემცველი, ფორიანი ლავის სტრუქტურით.

საინჟინრო-გეოლოგიური პირობების სირთულის მიხედვით, წიაღითსარგებლობის ობიექტის ტერიტორია მიეკუთვნება II (საშუალო სირთულის) კატეგორიას. ობიექტის ფართობია: 209215 მ², სასარგებლო წიაღისეულის ამოდების მინიმალური ამოდების სისქე შეადგენს 3 მეტრს. წიაღითსარგებლობის ობიექტის დამუშავება მოხდება ღია კარიერული წესით.

სკრინინგის განცხადების მიხედვით სალიცენზიო ობიექტი დაძიებულია დეტალურად და მისი რაოდენობრივი მაჩვენებლები მარაგების და პროგნოზული რესურსების კატეგორიების მიხედვით წარმოდგენილია B (749 ათ. მ³) და C₁ (2649 ათ. მ³) კატეგორიებით, რაც ჯამში შეადგენს 3 398 000 მ³ -ს. ობიექტიდან მოპოვებული წიაღისეული გამოყენებული იქნება სამშენებლო საქმიანობაში.

სკრინინგის განცხადების მიხედვით, სალიცენზიო ობიექტი არ ხვდება სახელმწიფო ტყის ფონდის, კულტურული მემკვიდრეობის ძეგლების სიახლოვეს, არც ტყით მჭიდროდ დაფარულ ტერიტორიაზე, სადაც გაბატონებულია საქართველოს „წითელი ნუსხით“ დაცული ხე-მცენარეები. თუმცა, როგორც უკვე აღინიშნა, საპროექტო ტერიტორიიდან 500 მეტრში მდებარეობს სახელმწიფო ტყის ფონდის ტერიტორია.

პროექტის განხორციელება დაკავშირებულია საკმაოდ დიდ ფართობზე (დაახლოებით 20,9 ჰა.) ახალი ტერიტორიის ათვისებასთან, რაც თავის მხრივ გამოიწვევს მნიშვნელოვან ზემოქმედებას გარემოს სხვადასხვა კომპონენტებზე.

სალიცენზიო ობიექტის დამუშავების დროს მოხდება ნაყოფიერი ფენის მოხსნა და შესაბამისად მოსალოდნელია ნიადაგზე ზემოქმედება. განცხადების მიხედვით, მოხსნილი ნიადაგის ფენა და ფუჭი ქანები დასაწყობდება და გამოყენებული იქნება ტერიტორიის რეკულტივაციისთვის. თუმცა, განცხადებაში არ არის მოცემული ინფორმაცია, ობიექტის დამუშავების დროს მოხსნილი ნიადაგის და ფუჭი ქანების მოცულობების შესახებ.

ღია კარიერული წესით დამუშავებისას მოსალოდნელია ატმოსფერული ჰაერის დაბინძურება და ატმოსფერულ ჰაერში მავნე ნივთიერებების გაფრქვევა. ატმოსფერულ ჰაერში მტვრის გავრცელებას ადგილი ექნება, როგორც მოპოვებითი სამუშაოების პროცესში, ასევე ნედლეულის ტრანსპორტირებისას.

საქმიანობის სპეციფიკიდან გამომდინარე, სალიცენზიო ობიექტის დამუშავების დროს მოსალოდნელია ხმაურის წარმოქმნა და გავრცელება, რამაც შესაძლებელია უარყოფითი გავლენა მოახდინოს გარემოზე. ხმაურის გამომწვევი ძირითადი წყაროები იქნება სატრანსპორტო საშუალებები, რომლითაც მოხდება ობიექტის დამუშავება და შემდგომში ტრანსპორტირება. გარდა ამისა, მოპოვებით სამუშაოებს თან ახლავს ვიბრაცია, მათ შორის სხვადასხვა დანადგარების მუშაობისას.

განცხადებაში არ არის წარმოდგენილი ინფორმაცია ბუნებრივი რესურსების (განსაკუთრებით-წყლის, ნიადაგის მიწის, ბიომრავალფეროვნების) გამოყენებასთან, ნარჩენების წარმოქმნასთან დაკავშირებით. შესაბამისად, აღნიშნული საკითხი საჭიროებს

შესწავლას. დოკუმენტაციიდან არ ჩანს წიაღისეულის მოპოვების ხანგრძლივობა, ასევე, საქმიანობის შედეგად გამოწვეული შესაძლო რისკებისა და საფრთხეების წარმოქმნის საკითხი, რაც სალიცენზიო ფართობის გათვალისწინებით მოითხოვს დამატებით შესწავლას.

ობიექტის დამუშავებისას წარმოქმნილი ფუჭი ქანების დიდი რაოდენობიდან გამომდინარე, მათი განთავსების მიზნით, საჭირო იქნება ახალი ტერიტორიების ათვისება და სანაყაროებისთვის შესაბამისი პროექტის შემუშავება. ამასთან დიდი რაოდენობით მოსახსნელი ნიადაგის საფარის და ფუჭი ქანების დასაწყობება/რეკულტივაცია მოითხოვს რეკულტივაციის დეტალური პროექტის შემუშავებას 2013 წლის 31 დეკემბრის N424 დადგენილების შესაბამისად.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება განთავსდა სამინისტროს ოფიციალურ ვებგვერდზე და ახალციხის მუნიციპალიტეტის მერიის საინფორმაციო დაფაზე. ადმინისტრაციული წარმოების ეტაპზე სამინისტროში წერილობითი შენიშვნები დააფიქსირა არასამთავრობო ორგანიზაცია „მწვანე ალტერნატივამ“, რომელიც ეხება სკრინინგის ანგარიშის არასრულფასოვნად შესრულებას. შენიშვნის ძირითადი არსი მდგომარეობს, იმაში, რომ წარმოდგენილი დოკუმენტაციით უცნობი რჩება საქმიანობის შესაძლო ზემოქმედების ხასიათი, ხარისხი და კომპლექსურობა.

სკრინინგის განცხადების მიხედვით დგინდება, რომ ახალციხის მუნიციპალიტეტში, სოფ. ანდრიაწმინდას მიმდებარე ტერიტორიაზე სასარგებლო წიაღისეულის, 3 398 000 მ³ „ოდუნდის“ ტუფობრექჩის მოპოვება თავისი მასშტაბით და მოპოვების მეთოდით (ღია კარიერული წესით) გამოწვევს მნიშვნელოვან ზემოქმედებას გარემოზე.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის და ამავე კოდექსის II დანართის მე-2 პუნქტის 2.1 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ახალციხის მუნიციპალიტეტში, სოფ. ანდრიაწმინდას მიმდებარე ტერიტორიაზე სასარგებლო წიაღისეულის, „ოდუნდის“ ტუფობრექჩის მოპოვება **დაექვემდებაროს** გარემოზე ზემოქმედების შეფასებას;
2. ლიცენზიის მფლობელი ვალდებულია საქართველოს კანონის „გარემოსდაცვითი შეფასების კოდექსის“ მე-8 მუხლის შესაბამისად უზრუნველყოს სკოპინგის პროცედურის გავლა;
3. ბრძანება დაუყოვნებლივ გაეგზავნოს სსიპ „წიაღის ეროვნულ სააგენტოს“;
4. ბრძანება ძალაში შევიდეს სსიპ „წიაღის ეროვნული სააგენტოს“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და

ახალციხის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;

6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი